

欽定剿平三省邪匪方略

欽定剿平三省邪匪方略正編卷三十九

丁巳年

五月二十一日

庚申

額勒登保福寧奏言前此進

剿車家灣黃花坡等處賊匪因分水嶺橫隔而

芭葉山之大壠口賊又劄有木城官兵急切不

能進取臣等查分水嶺半山原有小路可至大

壠口遂定於初四日發兵臣額勒登保由黃花

坡進攻分水嶺臣福寧由吳家坂出簡家槽分

擊俾賊匪顧此失彼是日五鼓臣額勒登保督

率綸布春薩克坦布等帶兵繞至分水嶺沿坡

賊匪劄有卡座官兵突入剿殺連得賊卡七八

處賊匪死者無算千總李榮光首先擊賊中鎗

陣亡天甫黎明距對面大壠口尙有五六里賊

匪於大壠口木城下築有長石卡一道卡內放

鎗甚密並有賊礮官兵所過之路羊腸一線難

於存住遂卽撤回

臣

福寧督同遊擊冬福都司

孫效前等率領兵勇搶上簡家槽賊匪俱於民

房佔據滾木插石俱下孫效前等奮勇直撲拋

擲火彈將房屋焚燒賊人被燒中鎗死者甚多

自簡家槽以上均係懸崖陡坎賊匪於山巔割

有木城石卡施放鎗礮且官兵離吳家坂已有

五六里山路錯雜難以輕進該匪等爲官兵四

面緊逼處處割有木城石卡深挖濠溝以爲抵
死抗拒之計大堖口係芭葉山要路必須攻得

而欲破大堖口又須先克分水嶺臣額勒登保

復於初五日抽調各卡奮勇官兵從分水嶺背

面徑上岩壁旣陡箐林又密綸布春三音庫等

率領兵丁隨處砍伐攀援挽挈自辰至未甫至

嶺巔臣額勒登保亦卽踵上眼見賊匪奔來大

大荒口木城當將礮位用繩繫上連放數礮打入
木城賊匪驚惶而男婦猶數百爲伍蟻聚蜂屯
被礮飛擊跌仆始行賊匪正欲乘勝下壓直撲
大荒口因嶺下坡坎陡削又係活沙官兵未能
遽下卽擊卡駐劄初六日至初九日晝夜密雨
不止初七日擊獲匪犯陶世能訊供林之華覃
加耀因糧食短少山上青麥未熟不能久住官

兵緊逼大荒口實在畏懼今於兩中下山踴路
仍欲脫逃查大荒口一帶營卡俱甚結實恐各
路營卡尙有未能周密之處臣額勒登保於初

九初十等日由鄔陽關至金雞口沿途察看
營卡俱屬嚴緊自金雞口至蠻路口層營壘嶂
道路綿長營卡尙覺稍疎當卽酌量抽撥官兵
三百餘名擬於猪耳寨二股嶺等處扼要山梁

添擊營卡初十日帶同關騰等甫經上嶺賊匪
竟敢攢聚先於隔溪放鎗直犯官兵並卽上坡
希冀截路臣額勒登保督令侍衛官兵奮力攻

擊斃賊多名尙相持不下諸神保由打子臺帶
兵趕至兩路截殺賊始潰竄官兵追殺二百餘
人遊擊林朝輔鎗箭疊斃賊匪猝爲賊鎗所中
陣亡遂分兵卽於猪耳寨三股嶺一帶擊卡十

餘處金雞口有慶溥駐劄管卡聯絡可無他虞
並卽令關騰移駐盤路口防範當此事在垂成
如各路有間可乘臣等敢不盡心剿辦以期殲

擒賊首掃蕩賊巢此次打仗弁兵間有傷亡容
另查明咨部辦理再將軍成德於前月二十七
日在石子坳等處打仗之後卽遍身發熱飲食
減少伊年逾七旬精神委頓臣等先後前往看

視諄囑安心調養去入

上命軍機大臣傳諭額勒登保福寧曰額勒登保等
分路進攻分水嶺等處山梁雖未擒獲賊首但已
將緊要山梁卡座攻克並於要隘接拏營卡緊逼
賊巢兩次打仗殺賊均爲奮勇出力額勒登保福
寧著各賞白玉喜字牌大小荷包綸布春諸神保
關騰著各賞喜字玉腰指大小荷包其殺賊陣亡

之遊擊林朝輔千總李榮光俱著咨部加等議卹
該處賊匪勢已窮蹙勒登保素爲奮勇諒必不
肯稍涉選懦其所稱連日密雨暫行拏卡駐劄之
處自屬可信但天氣晴齊後卽當乘勝進逼至林
之華等因口食短少不能久住現在踴路希圖脫
逃不可不嚴密防範額勒登保等務須督率將領
官兵四面圍逼斷不可稍有疎忽致令乘間逃往

鶴峯建始等處爲要至閱所進圖內賊前據之黃
柏山距芭葉山不遠今芭葉山賊匪築有木城賊
卡堅固林立斷非倉猝可辦從前額勒登保等若
非子賊以暇卽係守禦不嚴疎縱之咎皆所不免
惟在此番速擒首逆尙當加之恩獎不究前罪也
又據奏成德在石子坳打仗後感冒致疾尙未就
痊曾否調理全愈現在正當圍剿緊要之時石子

坳地方祇有成德駐劄今又患病恐未能督率嚴防閱圖內西北一帶有諸神保關騰張廷彥三人
在彼分駐著額勒登保福寧酌量情形抽撥一人
前赴石子坳替換成德防守方可放心

二十五日

甲子

興肇奏言

臣

前因勞峪口距賊已

遠地方寧謐於四月二十二日會商恒瑞秦承

恩帶兵馳抵秦嶺口堵防嗣探知賊匪相離更

違未便株守卽於五月初八日前進相機堵剿
初十日行抵廟臺地方據鄉勇等報稱有賊屯

潛回賊匪楊一喜王雲海等二名在曹家坪窰

溝石望溝一帶欲圖勾結習教匪徒歸夥現俱

在窰溝屯聚懇請剿辦等情臣卽帶兵行抵曹

家坪傳集鄉保詳詢屬實當卽帶領健銳營翼

長富廉等馳赴窰溝密派官兵繞赴山後先將

溝口扎住然後督兵前進搜捕該匪等見事已
敗露公然持械抗拒富廉等鼓勵將士鎗箭齊
發登時斃賊數十餘名餘賊搶上山坡擲石回
擊富廉等見其技窮卽督率馬步兵丁一擁撲
上賊俱四散敗竄經官兵趕上矛刺刀砍又殺
賊數十名并擒活口二十一名口楊一喜亦在
其內臣復飭令細加搜捕實已淨盡無遺訊據

楊一喜供係黃梅縣人素習邪教嘗溝石望溝
兩處俱有徒弟前月二十二日賊到採玉窰時
就投入賊營幫同打過一仗因聞得各路俱有
官兵所以潛回思要結勾衆人一同前去不意
官兵到來就被拏獲其餘各犯俱係從犯臣審
明後卽於軍前正法梟示其婦女幼孩五名口
發解商州照例辦理現在探知賊皆在西奔竄

此一帶地方無須防堵

臣

卽帶兵趕赴鎮安探

明惠齡恒瑞慶成等何路緊要卽歸併何路協

同剿辦奏入

上命軍機大臣傳諭興肇曰興肇于曹家坪地方將
該處潛逃勾結匪徒搜捕淨盡卽趕赴鎮安與惠
齡等協同剿辦早應如此辦理興肇究於何日趕
上惠齡等現在何處會同剿擊抑分路抄截仍著

速行加緊具奏

二十六日

乙丑

宜綿明亮德楞額奏言

臣

等奪佔

分水嶺火石嶺兩處山梁賊匪被圍緊急連次
來撲營卡俱被兵勇擊退亟圖分路逃竄查賊

巢東南北三面官兵營卡較密而西面白羅江
口至瓦窑壩二十餘里稍覺空虛賊匪若乘虛
西竄方坪山或折而北入陝境與楚匪彼此接

應均爲可慮

臣

等隨趕緊招募本地鄉勇四千

五百名派叅將瑪靈阿帶領配以官兵分安上

下毛坪及各要隘口嚴密巡查設卡把截

臣宜

綿移駐大成寨係中西兩路適中之地以便往

來策應

臣

明亮仍駐富成寨

臣

德楞泰仍駐茨

菇梁探明賊匪從何路竄逸卽就近派兵截殺

初八日賊匪二三千人潛赴花潭子欲由彼處

過渡竄入新寧經防守東琳河副將王承勳帶

領兵勇追擊穆克登阿西津泰聞鎗礮之聲隨

卽帶兵截回殺斃賊匪多名

臣

等思賊匪聲言

南竄更不可不注意西北遂傳令西北各卡加

意防守十三日五鼓賊首王三槐果率衆四五

千人分爲五路直撲北路毛坪一帶營卡

臣德

楞泰卽帶領巴圖魯侍衛溫春副將德寧等帶

領漢土官兵由萬古樓前往接應又令總兵達
音泰同巴圖魯侍衛安慶等帶領兵勇由張家
山從旁截殺總兵朱射斗同巴圖魯侍衛墨爾
歡保等帶領兵勇由黃家山赴觀音坪從後抄
截觀成奎舒明興卽分投在各營卡往來督兵
堵禦臣宜綿明亮聞報卽督率總兵索費英阿
等馳往督戰賊匪衝入毛坪鄉勇頭卡瑪靈阿

帶兵二百名從高壓下守備樊模王玉龍等帶
領鄉勇分兩翼繞出其後奮勇攻擊賊匪力不
能支而達音泰朱射斗溫春等亦帶兵趕到併
力截殺賊匪大敗王三槐中鎗落馬賊目鄭文
禮卽將自己所乘之馬給王三槐乘騎而逸兵
勇趕上將鄭文禮拏住又有王三槐之義父賀
宗盛中鎗倒地一併擒獲此外獲賊十一名共

計斃賊三百餘名奪獲各器械收存備用隨將
賀宗盛鄭文禮二犯及所獲餘匪分別磔梟示

衆臣等思賊勢日就窮蹙若就現有之兵直撲

賊巢似亦無難攻克但重石子香爐坪兩處有

名賊首俱在其中設令衝出追捕反爲費力現

在粵兵及各屬鄉勇陸續可到臣等卽分投帶

領攻取香爐坪重石子兩處賊巢一面督飭各

營卡四面截殺賊匪既不能堅守本寨又無路
可以逃生定可一戰成功至方山坪之賊於本
月初六七等日連次下寨搶割麥豆俱經總兵
百祥督率叅將雷仁增順等分帶兵勇奮力截
殺斬獲甚多查方山坪地面遼濶山勢險固百
祥帶兵僅止二千未能蕪事現駐劄大羅坪扼
其要害匪徒不敢大肆鴟張俟剿辦東鄉賊匪

竣事後臣等卽酌量情形分帶弁兵進剿以期

迅速嚴事

宜綿又奏言臣前因楚省賊匪竄至商州境內

一面抽撥兵一千五百名交柯藩艾如文帶回

剿辦一面傳催所調甘省官兵及撒拉爾回兵

徑抵興安聽候柯藩調遣並飭隨營之漢興道

文需迅速回陝督辦防守事宜復委隨營之榆

林守托銘趕回幫同興安守周世紹捍衛郡城
及柯藩艾如文先後馳抵興安因白河洶陽信
息緊急卽分投前往將所帶之兵派撥城鄉各
要隘旋赴蜀河口一帶防堵茲據周世紹托銘
稟稱賊匪一股由漢江北岸西竄已抵柳林子
地方距郡城僅五六十里賊人偵知有備又無
船隻可渡隨由松林壩竄至恒口鎮距漢陰廳

治甚近並據漢陰西鄉石泉等縣紛紛告急

臣

查興漢所屬存營之兵本少前次剿辦安康紫陽賊匪在在設卡防守及興屬肅清時值農忙鄉勇散歸力田此次竄匪突至若不設法剿辦勢必蔓延爲害萬一竄入川省邊境更屬不成事體

臣

現在所剿重石子香爐坪之賊勢漸窮

感而所調粵兵尙未到營正在萬分吃緊之時

若一經抽撥賊匪必至潰竄四出反至兩地不能兼顧前次所謂甘省綠營官兵計期當已早到西安正值秦承恩堵剿另股竄入孝義之賊必截留備用且亦不能繞出賊前惟有撤拉爾回兵二千名臣前聞楚匪竄至鄖西卽慮漢中空虛恐賊匪由小道乘間竄入隨飛札前由軍營派往甘省催調撤拉爾回兵之遊擊蕭福祿

令其逕由鞏昌漢中前進若賊匪西來卽可迎
頭截殺並連札陸有仁催令回兵兼程前進去
後迄今尙未得其入陝信息計程當亦不遠是
此項回兵正可藉以剿辦興安漢中境內竄匪
惟自循化起程道路較遠沿途並無大員彈壓
恐行走不能迅速查有隨營副將李文尉本係
回教都司白印斗曾經帶領回兵亦屬能事現

派該二員馳赴陝省漢中一帶董率照料與蕭福祿協催前進探蹤迎擊仍飛札阿藩艾如文相機剿洗前後夾攻以期速行竣事

同日英善奏言

臣

疊奉

諭旨以達州之賊在該州境內焚搶村庄若干川陝兩省有賊者約十分之幾被擾州縣難民復業者已有若干現在如何安輯撫綏並查今年閏六月

是否以趕種晚田如有力不能耕者卽當賞給
籽糧及時趕種仰見

皇上軫念黎元至意查川省幅員遼濶共計二百三
十一州縣其賊匪滋擾之區係川北邊界地方
不過一隅以保甲計算達州共三十保被賊擾
者十三保新寧縣共十保被賊擾者五保東鄉
縣共十五甲被賊擾者十二甲巴州共二十四

甲被賊擾者六甲大寧縣被賊擾者係九龍池
一帶地方就六州縣而論受害情形輕重不一
而按之通省形勢不過百分之二三自大兵剿
辦以來凡遇蕩平一處臣卽派正佐各員招徠
撫卹每大口給米五合小口減半並搭蓋棚廠
給與棲止其年力精壯情願充當鄉勇站夫者
照例給與鹽菜口糧亦可自食其力至賊匪起

事之初居民倉猝奔逃流離四散先經

臣

飭令

該地方官及遠近各屬一體收養酌給口糧護
送回籍嗣因時值春耕難民等籽種牛具蕩然
無存當飭地方官查明酌借以資耕作達州新
寧太平三州縣賑借事宜業經奏蒙

聖恩分飭道員督率印委各員實心經理現在該州
縣難民均已復業及時栽插至東鄉巴州大寧

三州縣賊氛雖未盡除而大兵四面圍逼賊匪無由蔓延難民亦漸復業現飭委員遵照章程隨時撫卹一律分別賑借本年六月逢閏節後較遲嗣後歸業農民尚可補種晚禾雜糧以資接濟惟有督飭道府等實力查辦務使閭閻均霑實惠斷不敢任聽吏胥捏冒侵扣均奏入

上命軍機大臣傳諭宜綿明亮德楞泰柯藩曰此次

賊匪潛逃花潭子地方欲圖竄逸經宜綿等派兵
分路截殺殲斃多人所辦俱屬可嘉宜綿明亮德
楞泰著各賞鑲寶石帶環玉喜字牌玉搬指大小
荷包觀成穆克登阿奎舒著各賞金盒密蠟嘉字
牌大小荷包達音泰索費英阿百祥朱射斗西津
泰明興著各賞玉搬指洋玻璃盒大小荷包以示
優獎賊首王三槐中鎗落馬仍被賊目給馬騎逸

殊爲可惜但賊匪經此番痛剿諒已胆落此時湖南撤回粵兵早到宜綿等所調梁山等屬鄉勇更當先至務須乘勝進剿將重石子香爐坪兩處賊巢速行攻取擒拏首逆再將方山坪大寧全行掃蕩又據奏抽撥將弁迎催撒拉爾回兵截擊陝省竄匪一節此項回兵昨據柯藩奏稱陸有仁令其暫停循化已降旨將陸有仁交部嚴加議處然猶

俟秦承恩查明覆奏今宜綿亦奏稱此項回兵速
札陸有仁催令兼程前進迄今尙未得其入陝信
息是此事竟係陸有仁停留遲緩貽誤軍行其罪
更無可諉業經降旨將陸有仁革職拏問解京治
罪英善可不必留駐達州卽赴甘省代辦總督事
務庶呼應較靈其四川總督事務卽著宜綿就近
兼辦至所調回兵現經宜綿於札催後又派員催

趙前進自必卽日可到柯藩等處又有秦承恩派
撥之延綏莊浪兵一千名正可迎赴漢陰一路奮
力截擊斷無在南岸興安坐守之理著柯藩等卽
將撒拉爾回兵於何日到齊如何迎頭截剿之處
迅速具奏

上諭內閣曰前因陸有仁將撒拉爾回兵暫停循化
以致遲悞軍行辦理錯謬當經降旨將陸有仁交

部嚴加議處茲據宜綿奏稱連札陸有仁催令回
兵兼程前進迄今尙未得其入陝信息等語漢中
一帶兵力稍單是以檄調此項回兵以資截剿之
用乃教匪竄至漢陰而回兵尙在循化且經宜綿
派員迎往連札屢催此時尙無入陝之信是陸有
仁從前遇事張皇假稱自願帶兵前赴陝境一經
降旨申飭正稱其不欲向前之心於檄調應援之

兵亦竟屢催罔應遲悞軍情較永保之漫無調度者尤爲過之不必更俟部議陸有仁卽著革職拿交刑部治罪至四川軍需事務本有該省司道董率辦理且宜綿現在川境帶兵剿賊所有四川總督事務卽著宜綿就近兼辦俾得一手經理呼應更靈英善著卽馳驛前赴甘肅新任藩司楊揆現在川省未卽赴甘英善著仍以刑部侍郎兼攝藩

篆并代理總督事務

三十日已惠齡慶成舒亮奏言臣等自黃龍鋪

痛剿賊匪敗賊兩股一由東南之秋糧川逃竄
恒瑞等督兵前往截剿一由西南之西毛坪奔

竄臣惠齡慶成等帶兵截剿途次探聞鎮安縣

所屬茨溝子仙溝閭家溝西溝口等處均有新
起教匪或數十人或三四百人在彼糾聚即欲

蠢動

臣

等一面督兵截剿西竄之賊一面密派

鎮將員弁分帶官兵前往出其不意逐一搜剿

旋據該將弁等將各處伏匪剿辦完竣並搜獲

白旗刀矛器械又擒獲活賊二百七十八名解

送來營訊據供稱該犯等素習邪教去歲已具

結改悔現因賊匪差人勾結是以聚集等候入

夥該犯等怙惡不悛甘爲逆黨當卽分別凌遲

梟示婦女幼孩發交該地方官照例酌辦連日
差探竄賊已分向西面狂奔又接到恒瑞來信
知東南竄賊被鄖西鄉勇截回亦向西竄是各
股賊匪俱已奔投一路臣等竊料漢江南岸現
有柯藩艾如文在沿江一帶督兵堵截並接秦
承恩來札添派副將田有成帶兵前往協助自
無虞賊匪偷渡且聞恒瑞等已自東南追來正

當乘此機會將賊匪圍至江邊庶兩岸環攻易

於荒事

臣

惠齡隨卽札知興肇富爾賽各帶原兵

由西北前來兜截

臣

等隨自東北掩擊十七日

馳至漢陰廳據署通判熊恢宇面稟西竄各匪

知大兵下壓未敢停留焚搶俱向西南沿江地

方奔竄聞得已有賊匪一股於本月十二日由

紫陽縣屬白馬石地方搶船過江

臣

等聞之不

勝駭異查

臣

惠齡自入陝以來屢經札會秦承

恩柯藩艾如文嚴飭該地方官務將船隻概令

移泊南岸並督兵在漢江上下口岸相機堵截

何以毫無防備竟至賊匪搶船渡江今越五日

之久杳無音信而賊匪如何搶渡及過江後竄

往何處該地方官亦無隻字稟報寔不可解今

既有在前偷渡之賊各股逆黨自必尋蹤竄往

而恒瑞現亦未經趕到與肇富爾賽均不知現

在何處

臣

等難于緩待當各選帶精壯馬步弁

兵連夜分路兼程向前抄截沿途所遇零星竄

匪殲斃無數於十九日先後馳抵鳳凰山高嶺

詢知嶺西卽係漢王城白馬石漩窩灘等處渡

口並探得賊匪在彼偷渡

臣

等卽分投前往乘

賊爭渡之時痛加剿殺自十九日申刻至二十

日辰刻在漢王城等處渡口督率侍衛章京馬步將弁兵丁施放鎗礮擊斃賊匪數百人伏屍滿岸擊翻渡船七隻落水淹斃者不在此數尙有未及上船四散奔逃被獲者共男婦三百餘人當訊據獲賊袁茂黃等供稱教首李全王廷詔姚之富等三股均已歸併一處被官兵抄截緊急人心想逃過漢江因恐對岸有兵攔阻先遣

人前來探聽見無准備纔陸續過去欲從西鄉
一帶逃往川省該犯等行走不及是以被獲隨
卽概予駢誅並獲有爲賊擺渡之水手錢正萬
等據供五月十二日賊匪由白馬石搶船渡江
屬實是該地方官並未將船隻拘泊南岸賊匪
偷渡後又不通稟而白馬石等處渡口並無兵
勇堵截均應查辦

臣

等已飛咨秦承恩查明具

奏並將前調撤拉爾回兵飭令不必過江現在
行抵何處卽由彼徑赴軍前以備協剿並札知

宜綿迅卽撥兵前來川省邊界堵截臣等趕將

擊壞船隻畧爲修補先卽督兵渡江追剿諒恒

瑞興肇等不日亦可趕到臣等分路前進設宜

綿已派官兵將賊截住正可併力剿賊倘賊衆

竟與川匪合夥亦自屯聚高山不復肆竄宜綿

與臣惠齡等兩路兵力較厚分布圍攻似易得手斷不敢稍有遷延

同日汪新奏言臣欽遵

諭旨起程回襄由水程順道稽查均州光化穀城一帶營卡尙俱嚴密各境村農耕作如常民情寧貼回抵襄郡因查襄陽棗陽宜城隨州鍾祥京山孝感等處避賊難民業俱先後各歸本籍惟甫

經安集亟須優加賑卹現已派委妥員分赴各處協同該地方官逐細編查丁口及被燒房屋趕于日內造送確冊責成該道府覆核以憑給發三月正賑並予房屋修葺以期難民均霑寔惠

仰副

聖上軫卹深仁至現在賊匪竄入陝境襄安一帶距賊較遠之處原募鄉勇爲數甚多目下節屆芒

種蒔插方殷業已酌核情形大加裁撤惟接惠齡札會軍營需用鄉勇隨同打仗飭令鄖郡各屬調遣數千名赴營應用卽經先後雇募前往再查賊匪現旣全數渡過漢江是江之東北一帶均已無賊所有秦承恩調來山西兵二千名延綏兵一千名宜綿調來甘肅兵二千名及柯藩艾如文帶來兵二千五百名自毋庸分防各處應

請將延綏兵一千名留于川陝各要隘分防其餘各兵應令原帶提鎮各員分行管領隨同前往剿賊查四川大寧縣地方現亦有匪徒蠢動該處與湖北之竹山竹谿等縣連界總兵馬瑀帶兵在彼策應但兵力單薄殊不足恃而劉君輔現帶官兵在鄖西上津堡駐劄離賊已遠可以撤去兵數亦屬無多惟襄陽夾河洲一帶尙有

總兵徐昭德等帶領官兵在彼彈壓該處離賊
更遠應酌量撤出統交劉君輔帶領移向竹山
等處嚴防以期聲勢連絡就近察看大寧賊匪
情形隨宜進剿均奏入

上命軍機大臣傳諭宜綿明亮額勒登保德楞泰福
寧惠齡恒瑞秦承恩汪新慶成柯藩日惠齡等自
十六日奏報剿賊情形後迄今已踰半月盼望基

切本日惠齡等報到以爲已將竄匪痛殲及加披
閱賊匪已於五月十二日由白馬石搶船渡江並
據獲犯供稱李全王廷詔姚之富等三股已歸併
一處惠齡等竟已放賊全數偷渡漢江尙敢覲顏
陳奏無恥之至並將在黃龍舖剿賊已往之事詳
悉鋪敘尤屬無謂據稱賊匪搶船渡江已越五日
之八地方官未經稟報固屬有罪但惠齡等緊追

賊匪今賊已渡江五日伊等始經趕到是行走落
後亦已五日剿賊機宜卽片刻亦不可遲緩何況
至五日之久豈非予賊以暇乃惠齡等竟以賊匪
搶船渡江與伊等無涉可笑已極況兵法有半渡
而擊者賊匪於十二日偷渡時若惠齡等急躡賊
蹤趁賊匪攜挈男婦慌亂之際邀之半渡痛加擊
殺可以聚而殲戮乃坐失機會實屬大錯至恒瑞

追剿後股東竄之賊賊旣折而西竄併入前二股
內恒瑞卽應上緊尾追與惠齡等歸併一路會剿
何以摺內稱恒瑞亦尙未趕到雖惠齡等首先貽
悞不能諉罪於恒瑞而恒瑞之罪亦卽在惠齡之
次又查閱惠齡等前進原圖惠齡慶成在鎮安與
恒瑞會合將賊勦敗前兩股之賊向西奔竄係惠
齡慶成帶兵追剿第三股之賊向東奔竄係恒瑞

追剿嗣經恒瑞具奏卽西鄉勇攔截賊復折而西
向恒瑞自當躡蹤追剿何以三股之賊俱併爲一
股而恒瑞旣不能趕上賊匪又不能與落後之惠
齡慶成會合一處是賊能歸併而統兵大臣轉不
能會合尤屬可惡可笑又賊匪于十二日偷渡惠
齡等于十九日始到白馬石相距已有八日賊匪
卽陸續偷渡豈有八日不能渡畢之理而摺內尙

稱剿殺後渡賊匪此不過爲站脚地步亦如伊等
節次所奏殺賊無筭之語無可考據不足憑信至
柯藩等在洵陽一帶正當遏賊西竄之路乃藉稱
兵少防守與安郡城渡江而南已屬非是况秦承
恩續撥之莊浪等處兵一千名諒已早到豈有賊
匪偷渡八日而柯藩近在郡治尙毫無知覺
旣不在城外沿江防堵截殺又不能趕赴惠齡等

一路殊不可解惠齡恒瑞慶成柯藩艾如文均著
傳旨嚴行申飭仍各據實明白回奏此次種種玩
悞若按軍法從事其罪尙不止于拏問惟因一時
帶兵乏人姑予以立功自贖之路惠齡所有前賞
宮銜世職雙眼花翎及恒瑞柯藩艾如文花翎俱
著革去暫留本任頂帶慶成除前已革去宮銜花
翎巴圖魯名號外著再降爲二品頂帶亦暫留提

督本任以便管轄兵丁再觀後效舒亮著降爲三品頂帶暫留副都統之任伊等經朕此次格外寬宥有自應倍加感愧上緊剿賊勉贖前愆若再仍前遲悞必將伊等于軍前正法示衆决不寬貸看惠齡等所奏情形賊匪早由西鄉竄入川境宜綿前接漢陰廳稟報自己酌派大員前來堵剿何以未據奏到今賊匪已偷渡南岸若遂州賊匪現已剿

竣宜綿明亮等俱應帶兵前來合剿倘該處搜捕
尙畧需時日或令明亮德榜泰帶兵與惠齡等兩
路夾攻或酌派提鎮大員會剿以資得力此在宜
綿酌定就目下情形而論宜綿等一路調度俱合
機宜今賊匪竄至川境而惠齡屢經貽悞豈可復
膺總統之任著一併革去與恒瑞慶成等分路帶
兵各爲領隊聽候宜綿調遣一切軍務著宜綿總

統明亮德楞額泰幫辦以期事權歸一至惠齡恒瑞
慶成柯藩艾如文等此次如何貽悞之處並著宜
綿先行查明據實參奏若惠齡等因此更不加倍
一切諉之宜綿以致悞事則伊等更當得何罪耶
又據惠齡等奏稱札知興肇帶兵前來相機堵剿
等語前此興肇亦曾以惠齡等以剿辦另起勾結
教匪敷衍文飾具奏但現在興肇究竟會否想上

賊匪與惠齡等會合何以未據續奏至漢江北岸
船隻前據秦承恩奏已飭令移泊南岸今據惠齡
等奏稱屢飭該地方官速行移泊何以復被賊匪
搶船偷渡是秦承恩前奏豈非空言若係地方官
奉行不實該撫早應據實叅辦並查明惠齡等於
何時札會地方官係屬何人著詳晰加緊速奏秦
承恩於此事未能預飭妥辦其咎已無可辭朕因

惠齡等諸凡貽悞於秦承恩且不加責備倘該撫
於移泊船隻一節心存迴護不肯據實叅辦恐該
撫亦不能當其咎也再據汪新奏接惠齡札會飭
令鄖郡各屬調遣鄉勇數千名赴營應用所辦大
錯賊匪由楚而豫楚省已無賊匪今由豫而陝復
由陝至川則豫陝兩省亦俱無賊惠齡等卽欲調
集鄉勇亦應就近于川陝調用何以復遠向鄖西

鄖陽等處檄調况前據惠齡等奏鄉勇一項必須
官兵在前方可倚仗何以此次又復有此調派惠
齡曾任湖北巡撫豈不知該省鄉勇僅能防護鄉
間於衝鋒陷陣不能得力乎至陝省邊界地方亦
關緊要秦承恩祇須於漢江北岸一帶駐劄彈壓
不必同赴川境所有惠齡等調撥山西甘肅等兵
可卽令迅速前往協剿該撫亦不可擁兵自衛且

川陝各要隘已留延綏兵一千名足資分防設有
不敷不妨就近雇募鄉勇應用其惠齡等所謂之
湖北鄉勇著汪新飭知不拘行至何處卽令轉回
所有沿途需費及口糧行裝等項俱著汪新查明
原札列名之人著落罰賠以示懲儆又據稱川省
大寧地方亦有匪徒蠢動應將郪西上津堡及襄
陽夾河洲駐劄之兵酌量撤出交劉君輔帶領移

向竹山一帶嚴防等語此時賊匪既由漢陰渡江
竄往川境是上津堡等處離賊已遠何必留兵防
堵置之無用之地現在大寧地方有賊匪蠢動不
但劉君輔馬瑀當迅速帶兵在竹山竹谿一帶邊
界堵剿卽總兵徐昭德此時又何必在離賊匪更
遠之襄陽夾河洲駐守僅爲護衛汪新之計亦當
帶領原有之兵迅往協剿不得稍有遲延倘該鎮

等不實力防堵使大寧賊匪潛至竹山竹谿有勾
結之事則惟劉君輔等是問至大寧賊匪前已有
旨令宜綿等酌派大員幫同剿捕究竟派令何人
酌帶兵力若干亦總未據奏及卽著加緊速奏如
此旨到時宜綿等已將重石子香爐坪等處賊匪
剿淨自應帶領勝兵迎剿漢陰渡江入蜀之賊其
大寧一路或令觀成穆克登阿並酌派鎮將帶兵

前往與劉君輔等兩面夾擊自無難立時撲滅也
上諭內閣曰現在楚省辦理軍需用款繁多著派怡
親王儀郡王成親王慶桂在內庫封貯銀內動撥
二百萬兩交直隸領餉委員照例迅速解往

欽定剿平三省邪匪方略正編卷四十

丁巳年

六月初二日

辛未

額勒登保福寧奏言林之華單

加耀等節次被官兵圍逼於大堠口二堠口一

帶添築石卡木城並深挖濠溝併力抗拒而入

芭葉山要路除大堠口二堠口之外如慶溥所

駐之金雞口對面山梁原係賊人竄入芭葉山

之路已經該匪挖斷築有石城關騰現駐之蠻

路口一帶與芭葉山尙隔一溪過溪又係懸巖

峭壁艱於進取臣等遂於十五日乘天氣晴霽

抽調各營卡官兵十六日五鼓臣額勒登保督

率綸布春等由石子坳進攻黃家村入二壩口

爲一路臣福寧督率薩克坦布等由鄔陽關過

河進攻黃家村入二壩口爲一路黎明會合先

將黃家村一帶賊匪全行剿殺賊卡房屋均卽

燒燬乘勢搶上二堦口該處兩山夾峙勢甚陡
險甫近賊卡賊匪集衆出卡迎壓巴圖魯侍衛
官兵等爭先擊賊有上梯越坎仍放鎗箭者有
攀藤援樹抄殺賊人者賊人抵當不住奔入卡
內復被官兵趕殺無算孫清元褚大榮張順等
首先跳溝直撲賊卡已將木城拆毀數尺賊匪
捨死抵禦刀矛相接男婦情急將滾水潑出亂

擲石塊而各處賊匪陸續趕來接應愈聚愈多
惟時我兵攻擊已至午後張順右膀中鎗穿透
肩窩褚大榮孫清元均帶石傷受傷弁兵亦多
不得不暫行撤回臣等本先派有官兵在半山
埋伏策應遂令先發之兵一面擊賊一面捲撤
賊匪公然追趕遇伏兵剿殺疊斃多人而竄臣
等復於十七十八九等日仍分派巴圖魯侍衛官

兵無論晝夜更番於三境口作進剿之勢使賊

人疑懼全力顧備臣福寧於十九日至臣額勒

登保營盤二十日五鼓一同進攻大荒口是日

督率綸布春張廷彥諸神保巴圖魯侍衛將備

等帶兵分路一由分水嶺之下繞至大荒口賊

卡一由分水嶺之上攻至木城拋擲火彈延燒

賊匪草房烟焰冲天賊人又復出卡抵禦被官

兵兩面夾擊殲斃無數賊匪遁入木城石卡施
放鎗礮推墮滾木插石石塊官兵無一人退却
而山坡陡險一石下擲迸起數石接遞飛墮兵
丁等藤牌^皆牌不能蔽護而賊匪木城石卡甚
堅濠溝亦深屢次奮力攻撲未能得手趕緊於
分水嶺下拏卡三處晡後漸次收撤叅將皂保
遊擊李錫命劉瑞都司閔懷希土都司阿朋楊

德明千總岑琨佩均各受傷

臣

等連日派兵在

二堠口誘賊意欲分大堠口之勢乃該處賊匪

仍復衆多總因賊匪自料必無生路是以捨命

固守其所據山梁周圍可見計山上糧食究屬

有限諒亦不能久支

臣

等現在熟籌惟有拏卡

層層進逼另行設法生擒首逆再節次帶兵打

仗官員出力者甚多內把總郁宗海外委桑漢

吳璉額外外委張容武生馬兵張紹廷巴東鄉
勇頭目黃耀奎房縣武生鄉勇頭目邢交善等
殺賊更屬奮勇其漢土弁兵及鄉勇人等均有
傷亡另行查明咨部奏入

上命軍機大臣傳諭額勒登保福寧曰初閱額勒登
保等奏似所辦尙屬出力及閱至後幅勒額登保
等始則進攻二垭口因賊匪亂擲石塊並將滾水

潑出不能越卡而進仍行撤回復於次日進攻大
荒口又因賊匪遁入木城石卡放鎗滾石亦未能
得手兩次打仗並未痛殲賊衆而將弁兵丁轉致
受傷數人且官兵既經撤回所擊分水嶺卡座三
處自必仍爲賊有並未進搗賊巢不值特加賞資
其受傷之叅將皂保遊擊張順等均著額勒登保
等存記統俟功竣再加獎勵所有把總郁宗海等

均著賞戴蓋翎用兵之道全在統兵大員相度機
宜出奇制勝賊旣負嵎死守自當設計籌辦或攻
其無備或聲東擊西或絕其糧食或斷其樵汲卽
不然亦當用計離間賊黨豈有專恃官兵衆多冒
險進攻之理以國家有用官兵與一二匪徒輕生
拚命致多傷損殊爲不值福寧本未嫻軍旅不足
深責而額勒登保久經行陣當曉兵機何亦漫無

籌畫若此况既燒燬木城卡座逼近賊匪並於該處拏卡額勒登保等自當卽在彼駐劄爲得尺則尺之計何以又行撤回豈非前功盡棄卽摺內所稱山上糧食有限不能久支等語亦不足信早經伊等奏稱芭葉山四面俱經官兵拏卡圍住試思賊匪甫由黃柏山奔逃至彼非在彼起事之處得以預儲糧食卽倉卒裹帶亦必無多而山內荒僻

處所何從得食若非下山掠取卽有奸黨暗地資
送否則何以久支時日額勒登保總當出奇設計
尅期剿淨若多耽時日不特賊人得以悉力准備
並恐匪徒乘隙他竄伊等俱受恩深重寧不思仰
紆朕厯耶

初三日

壬申

上命軍機大臣傳諭宜綿惠齡秦承恩柯藩曰前因

惠齡等行走遲延縱賊偷渡漢江降旨嚴飭頃又將伊等原摺細閱內稱俟將船隻畧爲修整卽行渡江追剿等語追剿賊匪不可稍緩須臾今賊匪於十二日偷渡惠齡等十九日始行趕到已遲緩七八日迨至江邊卽應躡蹤追剿何以又不尅期濟渡江邊自有船隻卽或不敷亦可紮縛牌筏遣行何得從容暇豫修理船隻豈賊匪肯因官兵修

船在中途停候乎究竟賊匪渡江後是否徑行竄
至達州抑或尙在沿途焚掠惠齡等自必得有信
息此時官兵自己早經渡江曾否趕上賊匪何以
未據續奏抑豈尙在修船耶著加緊明白廻奏柯
藩艾如文本在洵陽一帶遏賊西竄之路乃不在
江北堵剿轉渡江而南至興安郡城尙可藉賊多
兵少爲詞迨賊既渡江而莊浪等處撥調之兵計

已早到柯藩並不在沿江防守迎殺賊匪已屬玩
悞且賊已渡江八日柯藩等卽不能截殺賊匪亦
應趕赴惠齡等一路合力追擊何以從無一字奏
及豈惟知株守郡城藉此爲避賊安坐計耶秦承
恩駐劄鎮安槐樹坪地方賊匪渡江該地方官斷
無不稟報巡撫之理何亦未據奏聞况漢江船隻
前據秦承恩奏已飭令移泊南岸而惠齡等亦札

知轉飭移泊惠齡秦承恩飭令移泊船隻之人究
係何員此等玩悞地方官若不予以嚴叅何以示
儆秦承恩不能預飭妥辦已有應得之咎若再袒
護屬員不將貽悞之地方官據實查叅或軍需倘
有遲悞之處該撫自思當得何罪耶至宜綿業已
派爲總統一切軍務全賴調度伊係本省總督賊
匪偷渡後地方官自必隨時稟報宜綿得信後或

因達州剿賊緊要不能親自帶兵迎截亦必早派
大員前來迎剿所派係屬何人及賊匪曾否已入
川境何以總未據奏及朕因惠齡等種種貽悞心
緒甚煩宜綿其悉心調度明亮等幫同籌畫倍加
奮勉上緊趕辦以慰懸厪

初六日

乙亥

柯藩奏言昨據洵陽等縣文武員弁

飛稟有從鎮安黑洞溝竄來第二股賊匪約四

五千人分爲三股一股在洵陽之仁河一股在竹筒河馭家川一股由安康之黑水河竄至漢陰之銅錢窰青泥溝天水河等處各肆焚掠滋擾查賊匪詭詐異常分合無定臣實深焦憤惟

計所領之兵除撥給鎮臣艾如文帶往漢江堵禦暨遊擊阿克東阿帶往漢陰並撥置洵陽白河防守外郡城存兵無幾又恐賊匪由南山小

徑竄奔前股會合入川或竟潛渡過江撲搶興
安更爲可慮是以臣復於存城兵內湊撥兵二

百名並延榆綏道溫承惠派經歷劉觀光主簿
項朝槐等帶領鄉勇六百名現在各堤防守兼
之賊分數股又恐賊匪乘虛而入祇可在城彈
壓以固民心隨札艾如文帶兵馳至恒口嚴密
堵禦茲於五月十四日據署紫陽都司韋洪飛

稟探得頭股賊匪於十一日夜間盡數逃至相距紫陽六十里之沔峪河水淺處過江卽由瓦房店連夜奔竄等情查瓦房店路接川界小道極多前途各處並無官兵攔阻勢必竄入川境當卽一面飛咨宜綿速派官兵星夜趕至前途迎截母令入川合夥一面飛咨惠齡分撥官兵星赴興安以便臣帶領由漢陰鳳凰山徑截剿

二股賊匪茲於五月十七日二股賊匪已竄入
簡池舖經艾如文迅速趕上迤北山梁紮住賊
匪竟敢分頭撲搶官兵放鎗迎擊擊斃四五十
人賊匪退回午刻復糾結多人直撲山梁我兵
排鎗擊打賊匪伏地前進意欲趁空撲搶都司
蘇維龍帶領兵勇復用刀子扎砍賊匪三四十
人有一賊目身著紅衣搖動白旗放白鴿二隻

頃刻各處賊匪紛集勢甚洶猛兵勇捨命拒敵
吶喊壓下施放連環鳥鎗約又殺死賊匪四百
餘人並執白旗頭目一名賊匪正在窮迫之際
忽新蓋子林木內衝出兩股賊匪從後直撲前
來將兵勇分爲兩截兵勇奮力抵敵互有殺傷
把總劉應昇主簿項朝槐見賊勢轉盛身先兵
勇衝進賊陣格殺多人因周圍俱係水田失足

陷入受傷陣亡迨至日暮賊匪退入老林艾如
文仍令兵勇駐紮山梁賊匪卽於是夜翻山竄
奔適惠齡亦卽於十八日趕至漢陰十九日由

雲門鋪小龍溝前往紫陽追剿秦承恩亦於二

十日趕至興安臣面爲商酌將興安郡城卽交

秦承恩彈壓並撥給臣延綏莊浪固原漢土官

兵一千一十名臣刻卽帶領起身率同艾如文

田有成詢明路徑由漢陰趕往石泉南山小徑
迅赴西鄉查撒拉爾回兵亦於二十八九日可
到西鄉臣卽帶領迎頭截剿務期殲除淨盡不
使竄奔前股賊匪會合入夥其陣亡受傷兵勇
查明移咨秦承恩咨部奏入

上命軍機大臣傳諭宜綿惠齡恒瑞秦承恩柯藩曰
柯藩所奏殊不明晰且多回護前據惠齡奏賊匪

在白馬石搶船偷渡而柯藩則稱賊匪在相距紫陽六十里之河峪沔水淺處所過江已屬不符且惡齡前奏賊匪已全數渡江柯藩又稱艾如文在簡池舖遇二股賊匪殲賊甚多賊匪於是夜翻山奔竄又似後二股賊匪尙未渡江且所稱翻山奔竄究竟前往何處其第三股賊匪又在何處亦未奏明前因柯藩艾如文先在洵陽堵剿不能實力

防範致賊匪偷渡漢江是以將伊二人俱革去花翎今看此情形艾如文尙能帶兵邀殺賊匪勝柯藩遠甚功罪兩不相掩艾如文著仍賞戴花翎並加賞玉搬指大小荷包其陣亡之把總劉映昇主簿項朝槐著咨部加一等優卹朕從來賞罰嚴明艾如文旣帶兵出力豈可使之稍有屈抑至柯藩係本省提督朕方責以防剿重務不料伊竟將

剿賊之事專諉艾如文身在郡城安坐株守自圖
安逸况該提督於二十日在興安起身二十七日
方抵石泉此七日中豈竟未遇賊匪何以未據將
擊剿情形具奏非沿途逗遛卽心存畏縮柯藩著
再傳旨嚴行申飭並著宜綿秦承恩據實查叅勿
稍瞻徇又據奏惠齡於十八日起至漢陰十九日
往雲門鋪小龍溝前赴紫陽追剿秦承恩亦於二

十日起至興安等語此時惠齡等曾否帶兵全渡
趕上賊匪何以未見續奏而雲門舖小龍溝究在
漢江南北亦未聲敘明晰至秦承恩已到興安前
次賊匪如何偷渡漢江情形及江北一帶有無賊
匪官兵會否全數渡江見聞必確何以亦無一字
奏及惠齡秦承恩亦著傳旨嚴行申飭

初七日

丙子

秦承恩奏言賊匪於黃龍舖分爲兩

股東西奔竄惠齡恒瑞分兵追趕

臣

恐賊匪詭

誦故意牽制官兵復思北竄是以暫駐鎮安縣
之槐樹坪相機截剿嗣恒瑞東追之賊果有轉
回因北路有備復與惠齡等西追之賊竄合一

處

臣

卽於五月二十日馳抵興安查看漢江水

面甚淺何以賊至郡城北岸又復轉而向西而
詢興安守周世紹據稱頭股楚匪五月初四日

至安康縣松樹壩初五日蟻聚漢江北岸柳林
子逼近郡城該府率同文武員弁帶領兵勇在
南岸排列鎗礮悉力固守因僅有兵丁五百名
祇能與鄉勇繞城防堵其餘上下游淺窄之處
尙多勢甚危急忽於是夜江水陡長五尺奔流
湧急賊匪知不能飛越卽於初六日西竄恒口前
至青泥灣蒿坪河一帶屯紮郡城得保無虞實言

神助十二日江水稍退賊匪於紫陽縣上游白馬石
淺灘騎馬涉渡搶船過江行至紫陽三十六盤
地方因延榆綏道溫承惠督令地方官先將山
路掘斷不能前進隨循站路竄赴西鄉之騰溪
河適漢興道文需在該處查卡候撤拉爾回兵
未到卽於二十一日夜密帶畧陽營兵五十名
鄉勇四百名本地回勇三百名同武舉馬君召

賈生張映漢等乘其不備衝入賊隊鎗箭齊發
殺死賊匪七十餘人昏夜之中賊匪不知我兵
多寡丟棄帳房鎗矛等物登時潰亂由小路奔
逃經我兵生擒二人訊係湖北賊目張世龍帶
領當卽正法該道隨將兵勇撤至山梁紮住探
聽頭起回兵二十三四等日方能行抵西鄉一
俟到齊卽赴漁渡壩迎剿此頭股賊匪竄逸情

形也二股三股楚匪因柯藩艾如文溫承惠等
尤由洵陽趙家灣帶領兵勇趕回郡城防守賊
知有備不敢近城窺伺卽由任河一帶先後竄
至漢陰廳離城三十里之簡池舖屯聚十五日
分出一股在附近小龍溝焚掠十六日柯藩聞
信抽撥守城兵丁五百名鄉勇一千名交艾如
文帶領於十七日馳抵小龍溝口佔據山梁先

殺探路賊匪十餘人申刻賊匪多人直撲山梁
兵勇施放鳥鎗擊斃三十餘人賊放起白鴿爲
號溝內之賊復悉衆抄路上撲我兵施放連環
鎗又擊殺賊匪八十餘人並殺執旗頭目一名
賊始退回主簿項朝槐帶領鄉勇向前追捕馬
陷水田泥內身受矛傷陣亡弁兵鄉勇上前救
援追逐均有傷亡賊見不能搶佔山梁仍與簡

池舖賊匪會合西竄漢王城於十九日涉淺搶
船渡江向紫陽西鄉一帶奔逸此二三兩股賊
匪竄逸情形也惠齡等於五月十七日行抵漢
陰廳西門外二十一日由漢王城渡江追剿恒
瑞柯藩文如文等亦於十八二十一二等日帶
兵前赴漢陰與惠齡等分投前進臣抵興安後
人心頗定因思各路大兵俱在東北追趕隨將

臣

所帶兵丁挑選精銳各令裹帶乾糧交總兵

富爾賽取道漢江南岸由小路翻山徑赴紫陽

西鄉一帶出賊不意抄繞邀擊兼以斷其窺回

興安之路

臣

仍酌帶兵勇隨後接應計此時撤

拉爾回兵已可陸續行抵西鄉若惠齡等從東

追及正可兩面兜擒卽或與川匪歸併一處各

路大兵會合剿捕亦不難於殲滅惟陝省自商

維而至興漢表延千里賊匪奔竄地方均遭蹂
躪臣前

奏請之兵直至五月初四日始克全抵西安今賊
匪雖已西竄而興安漢中所屬必得重兵分地
防守且查寧羌南鄭前路有巴州方山坪之賊
西鄉紫陽安康前路有東鄉重石子香爐坪之
賊平利前路有大寧九龍池之賊是此時興漢

兩路實關緊要臣現將秦嶺等處防兵一千一

百名全數撤赴漢中如惠齡等追賊赴川後仰

懇

皇上卽令艾如文帶領延綏鎮兵一千名同赴漢中

府駐守彈壓柯藩帶領回兵二千名扼駐西鄉

太平要隘相機堵剿臣與富爾賽帶兵分駐紫

陽興安如此分途防堵互相聯絡匪徒知有准

備不致復思入陝俾臣得以招聚難民加意撫

輯惠齡等所帶兵丁半多陝省調去爲數不少

臣

此次奏調官兵原爲迎頭堵剿保護地方若

惠齡等因追賊赴川將臣所謂之兵全數帶往

則陝境仍屬空虛恐又蹈楚匪闖入商雒故轍

不得不預爲顧慮再興肇因北路事竣已由曹

家坪啓程不日前來容臣面爲商定趕赴前途

協剿奏入

上命軍機大臣傳諭官綿明亮德楞額奏惠齡秦承恩
曰據奏賊在小龍溝焚掠時柯藩聞信僅撥兵勇
交艾如文帶領前往剿殺該提督並未親往其咎
甚重昨已降旨嚴飭並將艾如文花翎賞還今閱
秦承恩所奏情形該提鎮功過顯然朕之賞罰纖
毫不爽至後二股賊匪於十九日全數渡江而惠

餘等於二十一日始行濟渡實屬遲緩本應卽行
治罪姑念一時帶兵乏人仍留伊等本職以便分
段領隊用觀後效若再不知愧奮伊等自思當得
何罪又據稱挑選精銳兵丁裹帶乾糧交總兵富
爾賽取道漢江南岸由小路翻山徑赴紫陽西鄉
一帶抄繞邀擊等語所辦尙好但賊已於十九日
全數渡江勢必奔竄富爾賽卽由小道繞往亦恐

未能趕上惟有盼望宜綿等聞信前來迎剿如此
首到時宜綿等已將重石子香爐坪賊匪剿淨則
正可親帶勝兵前來迎頭截殺固屬甚善設彼處
賊匪尙負隅死守則或於賊巢四面酌派提鎮大
員嚴密防範且不必與之接仗宜綿明亮德楞泰
等酌帶官兵迎至漢中西鄉一帶彼時撒拉爾回
兵自己到齊惠齡等卽不能繞至賊前而從後躡

追亦可自北下壓宜綿等自南夾擊俟李全王廷
詔姚之富等就獲後宜綿惠齡再併力進攻重石
子香爐坪更無難直搗賊巢惟在酌量而行至賊
匪現在竄至何處曾否已入川界抑或尙在陝境
沿途搶掠秦承恩現駐興漢一帶見聞必確仍當
隨時馳奏再據奏賊匪雖已西竄而興安漢中地
方必得重兵防守請令艾如文帶兵駐守漢中柯

藩帶領回兵扼駐西鄉太平要隘秦承恩之意但以防守陝西爲重不知賊匪現已渡江西竄所謂官兵自以追剿賊匪爲急若先須處處設兵防守是將有用之兵置之無賊之地豈不徒分兵力况賊匪從前滋擾地方一經竄往他處後亦未嘗遽行折回今秦承恩祇知在陝言陝所見甚屬非是戰守機宜貴通盤籌畫宜綿現在總統軍務且卽

係陝甘總督陝境亦其所轄著權其輕重緩急應
否令艾如文帶兵繼惠齡等剿賊柯藩留陝鎮壓
卽一面奏聞一面飭令遵照辦理至興肇行走已
覺遲緩斷不可又留于秦承恩處幫同防守務卽
迅速趕赴前途與惠齡等會合協剿

十二日辛巳額勒登保福寧奏言賊匪等佔據芭

葉山臣等從大壠口攻入疊次進兵未能卽得

查分水嶺下官兵已拏有營卡祇可仍由此路
接遞拏卡前進分水嶺與大堖口山勢相連將
近大堖口係一道山溝直上官兵仰攻遇賊匪
滾木插石齊下勢難存立_臣等因令官兵預伐
樹條木植以備各自捆帶併令將領等或於黑
夜或於霧雨中聽候隨時派撥猝進拏卡二十
六日二鼓_臣額勒登保派令綸布春等先帶兵

前進拏卡復督率楊遇春等前往左右埋伏接
應賊匪知覺卽放鎗擲石我兵於黑夜中一面
擊賊一面執持擋牌攜帶樹條木植攀援而上
接拏三處營卡追至天明見賊被鎗死者甚多
賊衆旋於午間聚集公然撲卡希圖收回殘屍
經我兵鎗箭齊發斃賊紛紛其分水嶺巔亦用
大礮轟擊賊復竄入木城藏匿二十九日曉霧

甚濃兼以密雨

臣

額勒登保又卽附近抽調官

兵督令前往擊卡

臣

福寧亦帶兵前來接擊營

卡三處賊人推滾木石施放鎗礮我兵因有攜

帶捆成樹條木植尙能蔽護抵當惟遊擊蔣觀

濤受有石傷官兵擊卡之處已與大堖口相近

劈山礮已可打入賊卡聞賊匪嘈雜之聲

臣

等

恐又有情急逃竄之事復卽飛傳慶溥關騰諸

神保張廷彥各路并成德一路之協領果爾明

阿叅將馬訓遊擊褚大榮等嚴密防範

臣

福寧

於傍晚回至鄔陽關初一日三更賊匪一股竟

撲鄔陽關一帶營卡喊稱要躲避官兵一股竟

撲諸神保所駐打子臺營卡妄想逃竄

臣

福寧

隨即添派官兵帶同將弁於鄔陽關下坡截殺

疊用鎗礮轟擊并馬訓褚大榮等亦用礮擊打

聞賊匪喊哭不絕黎明見屍橫遍地擊死賊馬
六七匹賊屍中有穿白布袍者四五人婦女亦
多共計有一百餘搜獲被傷賊匪余大德等二
名丁子臺諸神保一路營卡施放鎗礮并經諸
神保密撥官兵潛出山坡於賊匪上坡時連環
放鎗賊匪不能遠上臣額勒登保向在近處營
卡挑備奮勇官兵三百餘各遂卽帶領趕赴打

子臺派薩克坦布三音庫楊遇春陳時昌張廷
楷等帶兵抄至左右截殺其大莊蠻路口至金
雞口一帶亦俱有準備四更後賊匪漸少祇在
箐林放鎗想因四路俱有官兵仍行竄匿迨天
曙時見此一帶營卡外賊匪男婦死者計一百
餘人兵丁鄉勇等四路搜捕復割獻首級三十
餘顆擒獲帶傷賊匪彭老三覃世文等並男婦

五百名訊據彭老三及余大德各犯僉供林之華覃加耀等見周圍營卡嚴緊官兵逼近大壠口總想逃走叫我等夜間分路衝卡出去若能衝開營卡伊等隨後一同奔竄若官兵實在嚴密仍回芭葉山死守再定主意餘無要供當卽臬示查賊匪於官兵圍逼緊急輒思乘夜分路脫逃狡猾實堪髮指我兵現在分擊營卡無不

聯絡結實臣惟有於各口路再行酌量抽撥官兵設法盡力攻擊務期及早蒞事

同日宜綿明亮德楞泰奏言查重石子香爐坪

屯聚賊匪經臣等節次剿殺嗣與兵及各州縣

鄉勇陸續到營隨將周圍營卡布置完妥臣等

猶恐賊衆衝突又於峩城山七里峽等處各要口分布兵勇堅立營柵以爲外層防堵二十六

日天色稍霽

臣

德楞泰率同總兵朱射斗達音

泰巴圖魯侍衛等由田家山前進攻重石子

臣

明亮率同提臣穆克登布副都統銜西津泰總

兵木騰額巴圖魯侍衛等由黃家寨前進攻香

爐坪

臣

宜綿明興督同索費英阿等在兩路之

中策應黎明各抵山下

臣

德楞泰等令兵勇分

班輪番攻打賊寨自寅至午寨上滾木插石將

盡都司尤漢玉等首先搶上寨門我兵一擁而
進火焚草棚延燒殆遍寨內賊匪二千餘人概
被燒斃賊衆慌亂我兵刀砍矛刺餘賊冒烟衝
出其香爐坪之賊倚恃高險抗拒甚力率衆壓
下三次臣明亮等督率兵勇仍復撲上相持半
日賊匪見重石子火起驚慌無措四散衝突我
兵迎頭截殺賊匪退回上山者約二千餘人兵

勇四面密圍射入火箭風急火烈寨內之賊無
一倖免其兩處逃出之賊藏匿溝內是夜大雨
如注兵勇皆露立困守凡東西北三面賊匪竄
逃之處俱經兵勇截殺折回惟迤南一帶山勢
重疊雖經設有營卡而延長三十餘里路途散
漫賊匪連夜翻山滾巖紛紛遁逸其時副將德
寧玉柱帶兵趕至截住後起之賊

臣

明亮德楞

泰亦經追至兩路夾擊復殲斃二千餘人餘眾

俱上蔣家山至陳家壩屯紮等督率官兵圍

住山脚二十七日賊匪四面衝突經臣德楞泰

督令副將扎勒杭阿王承勳分投堵剿殺死三

百餘人生擒劉體全等三十二名隨提同二十

六日所獲賊匪楊陞元等四百八十七名逐一

研訊據供徐添德等因官兵四面逼緊正想衝

出重圍投奔巴州方山坪合夥不料官兵夾攻
措手不及是以各自逃竄求生又據劉體全供
係徐添德大徒弟劉學仙之父徐添德等逃出
後本要直奔新寧無如官兵各路追趕而峩城
山七里峽一帶又有營卡攔阻未敢衝出只有
暫住陳家壩再看機會等語當卽分別磔梟所
獲馬騾分賞兵勇大礮十五位鳥鎗刀矛八百

餘件收貯備用各路割獻首級二千餘顆及鎗斃落河屍軀分委員弁帶領眼目查認有無逆首賊目在內再行稟報查此次斃賊不下萬人賊中夙稱戰手者被殺過半且峩城山等處營卡周密賊勢較前更爲窮蹙臣等現在上緊攻剿斷不敢絲毫疎懈至楚省逆匪頭起已由興安竄至川省太平之大竹河前曾派委川北道

李鉉遊擊謝開先等督率鄉勇堵禦彼時正在四面兜圍之際不能分撥兵力臣恐該處民心

驚惶先發傳牌聲言兩廣官兵四千名全赴太

平迎剿民心稍定今此間兵數已可稍省臣宜

綿酌量緩急現復抽派二千名交朱射斗統領

趕至太平如楚匪已全夥入境即將各隘口分

布堵禦俟惠齡等帶兵到日前後夾攻如二三

起尙未入川卽先將頭起之賊殲除悉赴西鄉
紫陽一帶與惠齡等會剿二三起之賊此次打
仗都司尤漢玉于槍上重石子賊寨時得受鎗
傷千總陳裕後把總白清澄外委韓呈米永保
鄧宣羅應舉張永清張文倫馬望義均因爭先
殺賊陣亡其餘出力文武員弁及陣亡受傷兵
勇俟查明分別辦理

宜綿明亮德楞泰又奏言前據夔州府知府張
奎幹等稟報大寧縣九龍池等處匪徒蠢動查
大寧距軍營不過千里而地處萬山之中不通
驛遞文稟俱用鄉夫步送動輒經旬臣等不能
卽行分身前往督辦實深焦急隨與英善酌商
在附近重慶鎮標各營內抽撥兵二百名派遊
擊愛隆阿帶往剿辦去後嗣據稟報縣屬武溪

密蠟喜字牌大小荷包明亮德楞泰著賞給鑲寶
石帶頭帶環密蠟喜字牌大小荷包穆克登阿西
津泰朱射斗達音泰木騰額索費英阿明興著賞
給嵌松石金盒大小荷包都司尤漢玉首先搶上
寨門得受鎗傷甚爲奮勇如果始終出力著超陞
叅將其打仗陣亡之千總陳裕後等均著咨部加
等優卹打仗出力之兵著酌賞以示鼓勵但賊首

徐添德王三槐並未就獲亦尙未滿意現在賊匪俱在蔣家山陳家壩逃匿正應趁其據守未定之時尅日進攻不可稍有遲延至賊匪翻山遁逃時副將德寧玉柱何以不卽迎頭截殺僅將後起之賊截住該二員究未免失之遲緩現據奏獲賊供稱徐添德等欲衝出重圍投奔巴州方山坪合夥又供要往新寧一路奔逃宜綿等尤應嚴密堵圍

斷不可復令逸出至楚省頭起逆匪已竄至川省太平之大竹河現經宜綿派兵二千名交朱射斗趕往堵剿但該鎮帶兵未爲壯盛且第二三股賊匪或跟蹤奔竄合夥俱未可定亟須四川一路官兵迎頭截殺若此旨到時宜綿等已將蔣家山陳家壩賊匪剿淨則竟當統領全軍自南而北與惠齡等兩面夾擊倘宜綿等一時尙未能分身亦應于

明亮德楞泰二人內酌分一人帶領鎮將分撥官兵幫同朱射斗迎剿自更得力至大寧地方賊匪據奏知府張至幹都司徐朝綱等率領兵勇將鐵丸寺平南槽兩處賊匪撲滅其武溪響應之賊亦經該府等盡數擒斬並將教首陳青雲拏獲該府等應交部議敘今宜綿復令觀成帶兵六百名前往剿辦觀成到後務卽督兵進攻迅速蕪事毋任

竄至竹山竹谿一帶該處出力文武俟觀成查明具奏再加獎勵

十三日

壬午

惠齡恒瑞慶成舒亮奏言查賊匪三

股先後偷渡向西南一帶潛逃臣等一面渡江

追剿一面分派將弁帶領兵勇在於沿江附近

山內搜拏旋據副將凝德等陸續拏獲逸賊阮

金山等四百十三名並賊目曹漢東等五人押

解來營訊明均係李全等新招入夥之犯當卽

一併駢誅時臣恒瑞亦自紫金嶺等處帶兵追

剿前來沿途搜獲逸匪二百餘人訊無要供俱

經臬示五月二十三日臣等合兵一處據差弁

探得賊匪盡向西鄉太平一路奔逃並接秦承

恩來札現與總兵富爾賽帶兵前赴興安興寧

因西北一帶山路險紆亦由興安一路前來臣

惠齡隨札囑與肇暫在興安會同秦承恩駐紮
以防賊匪回竄聞柯藩已至漢陰札令取道西
鄉帶兵兜截其甘肅調來回勇不日可到漢中
已飭管帶之員繞截賊前統交柯藩帶領迎剿
臣等布置已定隨統兵趕緊前行緣漢江南岸
各山較之鎮安等處更險馬步兵攀援而上難
容並足一山上下輒數十里軍裝糧餉啣尾而

行每多遲滯且僅此一徑相通必須翻過數重
大山始可分途前進二十五日行抵西鄉所屬
王家溝地方滂沱大雨山徑溽滑跋涉尤艱而
山坡陡窄難以紮營因卽鼓勵諸軍冒雨前進
行至碾子埡少駐次早雨勢稍止復趕緊進發
迨抵小溝地方滂沱如注山水驟漲匯入溝溪
深逾丈許臣等差派將弁分投查探前途間有

一二小徑人馬均不能行該處山勢陡削下臨
大溪惟有房屋數處居民避賊未歸臣等卽令

將弁先將軍裝火器堆貯其中帳房等均爲水

阻臣等撫慰士卒權于山崖深林之下暫爲遮

避六晝夜雨未少息後隊官兵糧食餉項俱因

水漲阻隔幸各兵隨身均有乾糧暫可果腹第

恐日久難支臣等萬分焦灼連日遣出探賊弁

兵亦未回營惟有虔誠禱祝一俟天色開霽水
勢稍退卽設法紮筏搭橋覓路前往諒各股賊
匪遭此霖雨漲水亦斷不能遠遁務將賊匪截
住殲洗不敢稍有遷延再查阿爾薩朗前在鎮
安縣之表帶舖地方紮營堵截因聞一股賊匪
自西北竄赴縣城卽帶馬兵先往迎剿前鋒叅
領七十一等帶領步兵陸續前進阿爾薩朗途

遇騎馬賊匪二百餘人殲斃數十名追殺二十餘里餘賊遠遁正於王家坪紮營忽見山溝復有賊匪分投突出阿爾薩朗仍卽督兵迎擊不意中傷隊馬被害叅領七格等帶兵衝入攪殺一處七格等四員及副前鋒校雍強阿等六十二名同時受傷陣亡其餘馬隊官兵正在衝殺時叅領七十一等帶領步兵接應前來內外夾

攻賊匪始向東南鐵桶溝一帶奔竄至

臣惠齡

等前在米糧川剿賊恐其竄向西北一帶是以

派令阿爾薩朗帶兵駐紮表帶鋪堵禦初不料

姚之富等從此一路竄來且初一日

臣

惠齡等

甫至七里峽離王家坪一百餘里路程稍遠未

能卽知迨初三日始接阿爾薩朗來札祇知其

將賊殺退是以遣令前鋒枝祥保前往查探詎

阿爾薩朗已於是月追賊遇害臣恒瑞自採玉

窑追剿賊匪初一日紮營野猪坪離王家坪亦

有八十餘里初二日行抵該處始知阿爾薩朗

陣亡之事賊已向鐵桶溝逃竄隨帶兵趕緊追

往滴臣惠齡等將李全王廷詔等逼至黃龍鋪

地方兩股賊匪歸併一處是阿爾薩朗打仗陣

亡在先臣等聞信在後查健銳營原來官兵一

千名除節次打仗陣亡及患病養傷外現存兵
八百餘名統歸碩雲保管領

同日興肇奏承恩奏言臣興肇於五月二十四

日行抵鎮安洵陽接壤之界牌石地方附近居

民紛紛逃竄咸稱相隔不遠之黑洞溝內現有

賊匪起事頗覺倉惶臣是以劄營暫住審差妥

弁親赴偵探該處人民安靜如常傳訊鄉民據

供黑洞溝居民共四百餘家內有向習邪教一
百餘家上年巡撫委官下鄉化導都已具結改
悔本年楚匪入陝著人勾結伊等畏法不從概
行逃避今探聽楚匪過去陸續回來復業不料
奸徒暗播謠言以致鄉民驚疑多有逃避其實
毫無影響臣當令該鄉保帶同改悔之一百餘
人赴營面訊痛哭乞憐實無他故質之同村良

民均各力保無異

臣

一面宣諭

聖德堅其向化之心遣回安業一面密差訪查咸稱
其言出自聞士道隨即拏獲到案該犯供認本
係邪教因聽從楚匪前來勾結被本地改悔之
人驅逐有讐故捏稱伊等起事希圖官兵剿滅
洩忿當將該犯正法示衆謠言頓止居民旋即
寧貼二十六日行抵趙家灣連日大雨如注溪

水暴漲等候稍退趕至興安與臣秦承恩會晤查

各股楚匪經惠齡恒瑞等帶兵追趕撒拉爾圖

兵已抵漢中柯藩亦已迎往帶領宜綿等又分

兵三千名前來太平堵截正可會合夾擊惟聞

大兵趕至西鄉賊已分股先後竄至太平縣城

口場南溪場一帶滋擾該處係太平縣東路北

通紫陽六道河等處東北通安康滔河等處相

距界嶺自六十里至百餘里不等雖探聞賊匪
另開山路揚言欲與大寧縣老木園之賊會合
安知非因西路兵多故作此語牽掣官兵仍思

竄回興郡

臣

秦承恩前令總兵富爾賽帶兵翻

山前往紫陽現已密行知會卽令就近確探相
機設伏如果賊復竄回正可迎頭截剿其沿河
一路另派官兵五百名並添募鄉勇扼險駐守

但兵力尙單是以商留臣興肇暫住數日偵探

確實卽前往沿河一帶協剿如賊匪不致闌入

興境臣興肇亦卽取道赴川會剿再查投効舉

人王棠一載以來自備資斧糾聚鄉勇隨同官

兵打仗不辭勞瘁現又隨宜綿大兵赴川協剿

甚爲出力該員係乾州人庚子科舉人揀選知

縣可否俟事竣留陝卽以知縣先行補用以示

鼓勵出自

天恩均奏入

上命軍機大臣傳諭宜綿明亮德楞泰惠齡恒瑞興
肇慶成秦承恩曰惠齡等奏官兵渡江連日雨阻
情形一摺殊不知恥惠齡等節次貽誤朕早知其
不能成功是以革去總統今據奏到仍屬沿途逗
遛並未趕上賊匪果不出朕所料且摺內所稱漢

江南岸道路險峻難容並足軍裝糧餉每多遲滯
一節該處山路雖屬險窄然賊匪亦由此經行豈
能插翅飛渡而賊匪口食又誰爲之運送何以賊
能行而官兵獨不能行至云賊匪遭此霖雨漲水
亦斷不能遠遁尤不成話賊不能遠遁官兵正應
迅速趕上痛加殲殺斷無賊因官兵停留亦不向
前奔竄坐待追上之理此總由惠齡等行走遲延

到處落後虛詞支飾而不自知言之刺謬也看來惠齡等無能已極竟不足恃惟盼宜綿等攻克蔣家山陳家壩賊巢生擒賊首殲淨餘黨卽統領勝兵北來併力夾擊方可尅期蕆功至惠齡等前此調度失宜以致阿爾薩斯等遇賊陣亡迨官兵損傷甚多賊於十二日偷渡漢江惠齡於十九日趕到二十一日始行渡江旣已遲悞於前及渡江之後

又復藉詞遇雨耽延五日前後計筭後賊竟至十
餘日距賊益遠姑念惠齡恒瑞慶成等尙在帶兵
暫留頂帶以觀後效今頭股賊匪已竄太平大竹
河地方而二三股賊匪尙在西鄉一帶惠齡等若
能趁此新到兵力趕上賊匪擒獲首犯尙可將功
折罪若仍前逗遛致賊首俱被川省官兵拏獲伊
等自思當得何罪凜之慎之至柯藩現據惠齡等

奏令取道西鄉一帶兜截若該提督不知愧奮仍前畏惠避賊則恐不能當此重戾也至惠齡等覆奏阿爾薩朗等陣亡一節殊不明晰向來打仗殺賊官兵原不能一無損折豈有領兵大員及章京前鋒校等六十七名同時受傷陣亡之理況阿爾薩朗帶領健銳營勁兵千名卽猝遇賊匪從山溝突出無難奮力剿殺何致被賊戕害官兵如許之

多非阿爾薩朗漫無兩度卽係紮營未定以致賊
匪攻撲損傷若果如此則不追治阿爾薩朗之罪
已屬從寬豈可復膺卹典仍著惠齡等再行詳悉
覆奏恭領七十一在彼目擊情形並著宜綿面加
詰詢據實復奏勿得代爲徇隱又興肇等奏查辦
捏造謠言致黑洞溝鄉民逃避之聞士道拏獲正
法並探聞賊匪欲與大寧匪黨合夥之信恐其故

作此語牽掣官兵仍思竄回興郡等語現在賊匪
大夥俱已渡江向西南奔竄一二奸徒於賊去後
妄佈謠言恐嚇鄉愚原屬事勢所有祇須酌派員
弁在彼儘可查辦與肇不值因此帶領多兵藉詞
延緩至慮及賊匪竄回興安之語尤屬無謂賊匪
前在各處奔竄如襄陽南陽等處並未聞逃後又
復折回若以賊曾經滋擾之地處處留兵防守則

楚豫陝三省賊過之處皆須分兵駐劄卽數十萬
大兵亦不敷派撥秦承恩亦不應將興肇留於該
處爲自行衛護之計伊二人並著傳旨申飭現在
興安地方已有秦承恩防守興肇卽當速帶官兵
前赴惠齡一路協力追剿毋得再有延緩其投効
舉人王棠如果始終出力俟軍務事竣准其留陝
以知縣補用